

山陰州山吳氏族譜

第三部調字集

贊狀誌表

254
2277
31

狀誌表



文林郎福建安溪縣知縣木庵公墓誌銘

節齋公暨胡安人墓表

贈徵仕郎吏科給事中石邱公墓誌銘

封承德郎南京刑部主事恭肅公墓誌銘

贈安人章氏墓誌銘

履素公墓誌銘

中憲大夫雲南臨安兵備副使贈資政大夫太子

少保兵部尚書烏石公墓誌銘

累贈夫人茹氏墓誌銘



封安人贈夫人杜氏墓誌銘

勉庵公暨秦孺人墓誌銘

庠生賀山公像贊

奉政大夫進階中順大夫廣東嶺東道兵備僉事
州東公行狀

贈資政大夫加贈榮祿大夫太子少保兵部尚書
冲和公暨累贈一品夫人周氏行狀

清溪公暨孫孺人墓誌銘

登仕佐郎鴻臚寺序班致齋公行狀

又致齋公暨來孺人墓誌銘

贈奉國將軍雲南副總兵聖山公墓誌銘

東泉公暨鄭孺人墓誌銘

慶渠公行狀

明威將軍薊鎮提調巨川公行狀

明威將軍昌國欽總贈榮祿大夫左都督陝西寧夏洪廣營遊擊近洲公行狀

登仕佐郎鴻臚寺序班石洲公暨朱孺人墓誌銘
中大夫湖廣糧儲道布政司右參政贈光祿大夫
兵部尚書兩廣總督匪躬公墓誌銘

福建通志漳南道匪躬公事蹟

封淑人贈一品夫人孟氏墓誌銘

忠顯校尉羽林左衛中所鎮撫敬庵公行狀

孝淑張孺人行狀

進階光祿大夫山西霍州州判寄碧公墓誌銘

東泉公墓誌銘

東泉公墓誌銘

明故文林郎福建安溪縣知縣木庵公墓誌
福建安溪縣知縣吳公諱暎字時賢號木庵祖均
禮潛德弗耀考淵正統中嘗出粟千石助有司賑
散奉

敕旌爲義民母潘氏公生永樂壬寅春二月十有三
日比長敦孝友慎言行蚤遊邑庠屢屈於有司中
歲升胄監卒業秋官員外郎呂升聞公名延之官
寓師受刑書賴無冤獄旣而注選天曹成化丁酉
始有安溪之命公抵邑首以彰善去惡課農桑興
學校爲務時有邑庠生鄭仁膺貢辭以母老願乞

終養公忻然許之輒以事

聞得旌孝子會蕭丙三盧欽萃聚衆標掠民罹凶害
公令邑中刊木列柵延袤村落選壯丁編甲爲官
軍應援渠魁就擒羣醜瓦解境多棄地公歎曰民
食不足良有自也因籍民丁給農器使人墾田二
十畝時以勤惰行賞罰人爭効力民生始遂繼立
鄉校禮聘賢師修四維明五倫風俗丕變克成淳
厚之邦由是政聲旁達隣邑有訟不平者咸來取
決焉歲壬寅未及再考公以疾辭官去至泉州父
老呼號挽留入城郡守陳公聞之召慰之曰功成

節齋公洎配胡氏合葬墓表

山陰吳廷言既卒業成均將歸省其親且持羅儀甫所狀乃祖節齋先生及其祖妣胡氏之行實示且言先大父歿後廿有一年祖妣傾逝今又四年矣未有發其潛德者家父將立墓上之石以垂不朽而其辭未有屬敬命不肖以請於執事余交廷言久而表其祖之墓又出其父之命也則按狀而表之先生諱璇字文飾節齋其號世爲其邑州山里之右族曾祖均禮祖淵父暉皆隱居有行義先生兄弟七人先生其伯也自幼警敏有智長涉獵

書史通於大義而篤於孝弟之行居母夏氏孺人
喪哀毀踰禮事繼母駱氏盡愛敬無間言處兄弟
及從兄弟凡數十人皆盡友恭之道綜理家政蚤
作夜息懲酣斥惰恆以身先之與人交恂恂雅飭
喜怒不形人或犯之亦恬不以介意以故賢士君
子多樂與之游其禮度雍雍如也不幸於成化甲
午六月十五日以疾卒距其生宣德庚戌十一月
二十二日年四十有五而已厥配胡安人同邑壽
勝里人祖父皆有賢德不仕安人生而貞靜柔淑
言笑不苟女工之事一見輒能之稍長知謹於內

外之辨父母愛之年及笄歸吳氏時吳以貧雄一
鄉合族而居嘗有百餘人安人歸其家爲冢婦孝
敬儉慈於事上相夫睦親皆得其宜先生祖母性
素嚴諸子婦不可近惟安人旦夕左右奉事之皆
順適其心嘗語之曰此吳氏之賢婦也年五十先
生疾旣革顧安人訣且屬之養親教子應曰諾先
生卒居孀盡禮其所以養親教子益嚴於先生之
存也時廷言之父甫弱冠凡家之祭祀賓客寒暑
朝夕皆安人綜理之井井不紊而躬勤率下雖老
不廢蠶績其子請止曰豈爲家無餘蓄故躬勤不

已耶曰勤不可廢有餘蓄其可終恃哉不變廷言
爲適孫自幼撫摩抵於成立且恆勵之於學以繼
世德爲訓後廷言年十八遂領鄉薦克成安人之
志安人甫及見之而弗克祿養以疾卒實宏治甲
寅二月二十七日也距其生宣德甲寅九月廿一
日春秋七十有一合葬於其里烏石山之原子男
二長源卽廷言父也次某早殤女一適會稽章敞
侍郎之孫扈孫男四長便卽廷言次楠次桓次模
曾孫男二彥音女一嗚呼先生夫婦之所以自貽
者有餘矣雖其平素弗志榮達而有子克紹先業

既孫廷言遂幼掇巍科將來之慶邈不可量蓋爲善者自然之應也善其不可爲乎哉予故表諸其墓爲勸

賜進士翰林院編修文林郎兼修會典臨海周玉撰

年弘治甲寅 距生宣德甲寅月二十一歲
書春秋七十有一其功悖年

石邱處士墓誌銘

宏治十二年以子薨
貴贈吏科給事中

庶吉士吳薨子華在翰林恆感感不樂問其故云
薨父處士公得末疾卧牀褥者累歲矣越二年處
士君訃至予往吊慰之薨痛咽不能成辭數日乃
衰經詣予請銘狀出大理寺丞王君仲明其同邑
人也按處士君諱琢字文器其所自號曰石邱祖
諱淵正統末輸粟爲義民考諱暉生七子君行六
有異質年十三作屬對式十五妣夏氏遘疾藥必
親嘗嘗巾墜于廁蹙然曰俗占當有親憂越月夏
卒哀毀如禮有司欲舉爲縣學生君以父老辭弗

就既娶婦偕奉甘旨饑飽寒煖皆有節父小不樂
輒長跪問曰得非以兒不孝故耶弗得解則移日
不敢去左右父病瘡隱處醫謂非吮不能治君就
吮之無難色比卒哀踰母喪兄璇璧皆早世撫遺
孤若已子財帛婚嫁必先焉越俗多不育女有厲
禁兄玠生女忽斃爲仇家所誣告連逮數十人彌
歲弗決君爲抗辭理辯竟得白其餘撫羣幼遇疎
屬皆有恩每讀書暇輒讀

國朝所降律令曰仕者可以資政處者可以檢身故
雖弗試亦藉以寡過家政曲直率多受決鄉黨內

外翁然咸稱曰賢云薨舉于鄉君曰必取進士薨
卒業國監三年居京師攻苦力學竟成君志君方
喜其成名而遽以疾故弗克就養而卒年四十有
六而已嗚呼身弗顯又蚤沒錫典具在而弗及見
焉悲哉然其所以自貽者則有餘矣君娶司馬氏
宋溫國文正公之裔四子薨其長次臯次夔次龍
一孫男夢聖女孫亦一君生正統己巳五月十六
日卒於宏治甲寅九月十七日葬郡城西南二十
五里項里案山之原薨本名舜在翰林奏乞改今
名予禮部所舉士又奉

詔受業者也其所爲乞銘以此銘曰

學以耕喻

古有明述

君教子仕

寧養弗恤

積久而發

有祿與秩

經畝載岱

其苗有淳

我躬弗飶

而藏斯溢

彼惰游者

疇勸疇率

刻銘著功

以告來日

賜進士出身嘉議大夫禮部右侍郎兼翰林院侍讀

學士經筵講官兼管

誥敕兼修

國史長沙李東陽撰

明故封承德郎南京刑部主事恭肅公墓誌
山陰吳氏系出延陵季子之後有慎直公者來州
山家焉遂爲山陰人至今封主事公五世矣主事
公諱源字宗本少穎異喜讀書又喜與名士大夫
相遊處嘗歎曰國之無良臣家之無良子弟由教
之不早教也聚諸子姓延士之有經術行誼者俾
訓迪之未幾弟薺子便相繼舉進士薺爲給事中
便爲南京刑部主事封公如其官吳氏遂顯其後
二十年孫彥又舉進士爲御史吳氏益顯人有稱
善教者必曰吳公吳公其孫彥嘗以言事謫尉思

恩尉故小官思恩又去京師極遠其地雜民夷居
之號爲險惡彥謂所知曰我言官卽死思恩無憾
惟我祖老矣或不能無念我奈何比彥捧檄入公
迎勞曰我孫真御史雖謫我固自樂旣又曰
聖天子不以汝狂謬俾猶祿下邑

國恩至矣汝將何以報諸聞者益謂公知大義可謂
善教公性質直好面規人過然其律已能審取舍
薄嗜欲慨然有志於趙清獻公之爲人其待宗族
恩禮周至義之所激日揮千金不顧故人亦服其
賢莫有怨惡之者享年八十二以嘉靖甲午四月

八日終於正寢時給事君已卒便歷官雲南副使致仕彥起爲廣東僉事而諸孫又彬彬以文學有聲庠序間公可謂壽且榮已公元配章氏繼配俞氏皆有懿德以便貴贈封皆安人公之寢疾也俞安人年已七十七晝夜侍湯藥積憂與勞竟先公一日而卒其賢足徵云公子四人長卽便次楠桓模孫男十人長卽彥次音意奇靖翊產毅韶歆靖毅皆郡庠生曾孫男十四人恆邑庠生次化恂悅凡伉兌餘幼未有名孫女二曾孫女二元孫女一便以卒之歲十二月二十二日啓章安人熊山之

北奉公及俞安人合葬焉顧謂彥曰徐子子升汝
同年也而素業文盍徵銘乃以給事汪君子宿狀
來請予不得辭銘曰

歟相古之教厥有義方嗟今之教

一日以辭彰子弟父兄四人恬然授受

語文日繁語用則疚偉哉封君

教以其身明明庭訓大義是陳

惟君之後尚世守此君教之存

君則不歿

賜進士及第浙江按察司僉事奉

敕提督學校前翰林院編修兼

經筵官修會典成典華亭徐階撰

章孺人墓誌銘

宏治十六年以子便貴贈爲安人

國子生山陰吳便之母卒葬於邑熊山之原四年矣墓上刻文未具間以其父宗本命奉狀屬筆於予按孺人諱貞順姓章氏山陰阮社里名家父斌母嚴氏皆有賢德重家教孺人生而純明孝弟端一柔婉在父母側謹謹奉訓戒秉禮法佐母治衣服飲食之事皆如父母意甚鍾愛之年十六父母爲相攸是時孺人夫宗本之曾大父諱子昂最有家法大父景暘尤以好善樂義聞於鄉宗本景暘之嫡孫也遂以歸之旣歸不數歲舅氏歿出資裝

以助襄事孝事其姑胡凡晨夕饜飴必躬調潔以進相宗本以德蚤作夜息織衽以助給家費自執儉約安疏糲遭章季造孺人以父母貧窶心竊苦之每自恨生不爲男以供父母之養也姑察之遂恆致助用安孺人之心平素於薦祭致嚴於賓客有禮處妯娌以和待臧獲有恩蓋自其家之上下內外稱其賢無間言宗本嚴於教孺人承意而善誘之於內恩義兼盡故其子皆力學有成宏治己酉便年甫十八卽舉于鄉人人榮而羨之曰非教之篤安能速子於成也後便將赴禮闈孺人爲治

裝甚悉戒之曰必取進士無墜其世便至京攻苦
彊學居國學甫半載將大其成而孺人之訃至矣
實宏治癸丑五月二十日也距其生四十有二先
是謂宗本曰君爲宗子我歿君卽當擇賢繼主饋
以承祭祀不及他事嗚呼若孺人者其賢矣哉子
男四長卽便娶茹次楠娶葉次桓次模未娶孫男
二某某女孫一銘曰

維靜維貞

其德之粹

敦孝敦睦

其行之懿

婉彼令人

君子之嘉

於世幾何

遽歿興嗟

我我厥藏

履素處士公墓誌銘

易曰履素往無咎夫素之義大矣而履之僅得無咎聖人之戒深哉履素處士姓吳氏以佑名以天相字山陰州山里人王大父潛大父旻父鈺母張氏公生而峻嶷父母鍾愛之公亦善承志意昆季六人友于無間言其整閨門內外斬斬聯姻族務本計皆有可觀雅尙禮訓子弟必延名儒鄉人嘗有貧不能舉喪買棺置之亦有爲營塚壙斥地與之者有急赴公周之無吝容亦而德邑而歲凶來稱貸者多不責償行年五十無微譴於其身貌癯

而古行篤而純鳴呼易道湮微久矣如公者其庶
幾知聖人之戒而素履無咎者與公生於成化十
三年六月十六日卒於嘉靖五年五月廿八日配
余氏子男四人長詢娶秦氏次諮邑庠生娶謝氏
次論娶秦氏次諤聘周氏孫男二十人曰大宗大
用大德大觀大受餘幼未名孫女一今詢等扶公
柩以嘉靖七年十二月十八日厝於古城祥山之
原因銘曰不詭不激靡愆靡忒恆其德占于易壽
雖嗇而生也直宜銘藥石

賜進士奉直大夫廣東德慶州知州邑人周文煥撰

明雲南按察司副使烏石公墓誌銘

萬歷十一年以孫兌貴加贈兵

部尚書

嗚呼此憲副烏石吳公之兆也公之子考齋彥往
以侍御謫倅余郡延平余時為諸生辱知愛今嘉
靖癸丑十二月十二日考齋將奉公柩與茹杜二
安人合窆於紹興郡西郡山之岡先期以兵部武
選正郎余同年龍溪王公之狀來徵銘義不獲辭
謹按狀序而銘之公諱便字廷言烏石山人其別
號也始祖均禮以質直稱于鄉高祖淵出粟助邊
求樂中得璽書旌表為義民曾祖暉祖璇皆好

善父一得翁以公貴封主事嚴毅方正母章氏俞氏封安人公生而沈默幼以穎悟爲時所器登宏治己酉鄉薦繼登宏治壬戌進士授南京刑部廣東司主事審讞明允諸司疑獄卒質平之遇

武廟登極上

太皇太后徽號得與 恩封歷陞至郎中擢雲南府知府節汰冗費芟剔奸慝崇教化勵廉節屢與薦剡沐府每戒其左右曰無干法爲太守所知也蓋憚公之嚴明如此未幾擢臨安兵備副使臨安在滇南爲邊郡聲教罕及土官舍舊稱難治公待以

誠信齊以法紀肅然罔有貳者廣西潯江南寧尋
甸宜良雖甚遼遠公節制有方陸涼越州曲靖平
夷尤號慄悍公綏柔之使帖帖至於馬龍木密咸
奉約束凝然有古干城之風而妒公者中以萋菲
遂謝政歸田侍養一得翁盡孝道務得其懽心公
平生無私蓄所餘俸悉以奉親處昆弟怡怡事一
得翁致敬至老不衰居喪執禮不用浮屠教子考
齋以聖賢之學使求其遠者大者嘗論講學日須
務實行齊古賢哲考齋亦奉命唯謹性尤不喜華
靡歲祀奉祭以敬接卑幼必以禮雖至老且疾無

愆禮儀若公者可謂終始不忒出處無忤其卒也
庶幾得正以斃焉者矣於惟休哉公生于成化辛
卯卒於今年癸丑六月十五年八十有三娶茹氏
繼杜氏先公一年卒贈封俱安人子長卽考齋彥
茹出癸未進士歷官至廣東僉事次意早卒次毅
國子生杜出女二長適施紹次適徐來卿俱卒孫
男十恆恂悅兌忱兌沈耽志念悅國子生恆恂兌
郡邑庠生孫女三曾孫男五有祥有政有道有思
有連曾孫女八銘曰

維公之世

雄彼浙東

維公之德

媿于古風

早奮甲第

夙秉彝忠

秋官初政

折刑惟中

繼縮虎符

滇南之域

崇政黜衰

羣奸屏息

晉副憲司

兵戎是職

奉

敕拊循

疆場翼翼

遠人公戴

公讓不居

奉親歸老

有子名儒

浮華兢中

嚴正是趨

受茲天爵

薄彼金魚

吁嗟公殂

名垂于世

壽考維祺

克昌厥系

既惠既慈

惟孝惟弟

勒茲貞珉

貽百千歲

賜進士出身通奉大夫浙江布政司左布政使前翰林院庶吉士南平游居敬撰

公... 公... 公...

... 公... 公...

... 公... 公...

... 公... 公...

... 公... 公...

... 公... 公...

敕贈安人茹氏墓誌銘

萬歷十一年以孫兌貴加贈為夫人

新遷雲南郡守山陰吳廷言持其所自為厥闔茹安人行狀詣予請曰先妻下世已有年矣尚未納諸奧隅亦歐陽公所謂有待之意自吾官刑曹未逾年遇

武廟登極上

太皇太后徽號加恩區內賜贈先妻為安人宿願已償而因循迄今者糜祿末由躬舉不欲委之他人茲喜外補取道歸桑梓諏日卜兆以終厥事焉子吾同年友也且與同官有異姓兄弟之義幸為

我銘之余不佞義不敢辭謹按狀安人姓茹諱璽
字德溫自幼純明莊重殊不類凡女態父母見而
異之曰使吾有子如此女不憂不亢宗也然必擇
良家子以歸之後竟得廷言焉時廷言方弱冠哀
然舉於鄉里閭豪家爭求爲壻未幾醮安人同宗
以爲得人賀自廟見以來溫惠以承上冲厚以字
下雖顰笑亦自愛以故胡氏太母動得其歡心其
餘可知矣廷言兩舉進士不偶竊料丙辰春試萬
一如故將畢業北雍安人聞而難之乃相許曰旅
食京華清苦弗堪願隨君行以分此苦因偕焉是

歲廷言果游太學常悒悒不樂安人曲爲寬假曰
吾聞君子所處者遠則必有所待所就者大則必
有所忍君無憂焉廷言改容謝曰若等尙有此見
吾輩弗逮乎自是忘情得喪益勵所學每至夜分
乃寢安人寢興與俱雖寒暑不輟良朋萃止盛陳
酒殽以延之雖截髮典衣弗恤也人謂有鷄鳴賢
婦風使其無恙覩廷言鼎甲之捷荷衣幸而表
朝廷冠帔之封其不負安人已審矣夫何廷言登第
後安人蓋棺垂六年矣天胡不欲人之善良乎何
奪安人之速也安人生於成化己丑十一月十二

日歿於宏治丁巳九月十三日享年二十有九生子一名彥穎敏有決科之才娶金氏女一名師莊適江墅施紹孫男一嗚呼安人其不幸而歿於廷言未仕之先而不食相夫之顯報其亦幸而葬於廷言既仕之後而可借夫光於貞珉焉是銘之不可不作也勉爲之銘曰甘旨勤渠內相孔賢胡有其德乃促其年蘭膏淬勵重爲弗堪胡均其苦不同其甘非常之變數存其間遺兒飲恨出涕潛潛天不祿躬而榮其名龍章褒贈掩映佳城

賜進士奉議大夫南京刑部郎中豐城江淙撰

明故 敕封安人杜氏墓誌銘

萬歷十一年以孫
兌貴加贈爲夫人

安人姓杜氏名端字維莊上虞五夫里人也父諱
鏞字世和宋祈公衍之裔宏治間爲戎政府書辦
官安人以長女在室年十七性貞靜淑慧克遵姆
訓年兄烏石吳公領己酉浙江鄉薦遊太學因獲
配焉歲壬戌烏石公登進士第偕之還家甚愜舅
姑心明年同北上授南京刑部主事遇

恩例封安人尋轉員外郎陞郎中庭中稱平陞雲南
府知府臨安兵備副使所至有惠政皆安人爲之
內相也先

贈安人茹氏遺男曰彥女曰師莊俱幼安人撫之若
已出厥後彥登進士第能守官箴師莊適同邑江
墅施紹遭末造其愛育植立之功不可誣自烏石
公致政後共事舅姑十五年凡寒暄甘旨之節溫
清定省之儀靡不殫力爲之至延賓客處妯娌給
姻族均施予烏石公百順以承親志安人百順以
成夫美故閭里咸稱爲孝子孝婦云生於成化辛
丑十一月五日卒於嘉靖壬子五月二十三日享
年七十有二今年十一月二十四日窆于十七都
郡山之麓乃若子姓之自安人出者烏石公自謂

百歲後備載于合葬墓碑中今不預書銘曰

命官殫職

命婦佐之

孝子有志

孝婦成之

惟皇眷德

福履綏之

考終令命

全而歸之

郡山之麓

窆而藏之

子孫繩繩

敬而祀之

嘉靖壬子冬十月吉日

賜進士中順大夫福建興化府知府上虞年生朱衮

撰

勉菴公配秦孺人墓誌銘

勉菴吳公配秦氏安人諷萬歷三十年八月十三日合葬青山之原冢孫吳履道暨弟吳憲中先期核公行實丐余言垂不朽予忝履道甥壻忘其固陋按實誌焉公諱詢字世明別號萬竹裔出自吳公子札之後歷世慎直府君始卜居越之州山慎直府君生潛潛生旻旻生鈺鈺生佑卽公父也行實載周進士文煥撰誌內母余氏溫惠齋莊克樹母儀爲後楷也公生而穎敏履素翁延名師訓公暨仲諮諭之曰吾家八伯大兄起家科第爾曹可

墮家聲邪公曰謹受教兄弟邁征能於制舉累試不遇迨仲弟諮補弟子員遂承命督家政履素翁富厚好施公善承意旨濟美樹德勤勤溫清修膝下歡極甘旨隆敬養焉丁內外艱哀毀不勝僅無滅性迎堪輿家錢姓者考卜經年始塋古城諸凡廬墓巧銘類一稟於禮慎終也兄弟四人公伯焉友于因心不藏其怒分貲財必豐於弟嗇於已祖居美麗悉讓諸弟創建新居於黃慶漚規制宏遠傷夙志之未竟延師課子禮遇甚隆閑家軌衆禮教凜凜然嚴爲範而寬爲容人易近之公生吳宗

盛際方奢溢相高競所不知而公獨斤斤樸素矚
然不滓鄉黨歸仁有獨行君子風焉厥配會稽楊
祊秦安人廣西按察使司副使銳嫡孫女也安人
出自世室女貞夙利性凝而靜氣和而婉于歸後
聚順舅姑余安人號嚴肅益加怙飭得其歡心孝
行有聲侍巾櫛兢兢敬戒諧於妯娌常有以自下
絕無纖毫貴種態鞠多男以慈羣焉雅馴速於肖
也逮下有恩而不妒訣時季兒甫襁褓屬於曹姓
婢卒藉其力以拊摩成立德安人也時富侈成風
婦人服飾潛踰安人作法於涼閨門之修秩如焉

僉謂尹吉能婦順矣惜乎優於德而奪之壽也公
生於宏治九年六月十二日亥時卒於嘉靖二十
五年十二月二十日申時安人生於宏治十年十
月二十七日卯時卒於嘉靖十九年五月初八日
午時生男六人長大宗娶鄭氏次大德娶朱氏次
大觀娶周氏次大受娶陳氏次大綱娶朱氏次大
禮娶沈氏孫男二十人久道承道履道衛庠生正
道遵道繼道致道時中邑庠生粹中憲中邑庠生
有道王道隆道格道受道謀道盛道茂道昌道相
道孫女四長適峽山何繼祖次適道墟章如約三

適偏門金儼祖四適偁浦王學成曾孫三十人曾
孫女四元孫二女一誌畢銘曰

人澆我淳

還於性真

倡以恆

隨以貞

德之行

福之徵

不於身

於後人

宜求於貞珉

賜進士第翰林院庶吉士眷晚生錢象坤謹撰

賀山公像贊

猗歟我師

先子之甥

恂恂家令

彬彬諸生

文章秣潤

孝友性成

心府不設

忠信而貞

厥配聖善

庶幾良朋

福綿子孫

不愧簪纓

賜進士及第左春坊左諭德兼侍讀學士同修

國史

兩朝實錄副總裁同邑門生張元怵題

明故奉政大夫廣東按察司僉事進階中順大夫

州東公行狀

公諱彥字士美號州東系出延陵季子之後明初
慎直公占籍于山陰之州山以行誼重於鄉二世
淵求樂中有助邊餉旌表義民高祖暉曾祖璇皆
隱德弗耀祖源號恭肅翁

封南京刑部主事父便號烏石翁舉進士歷官雲南
按察司副使凝重端慤蒞官所至有惠政居家以
孝友稱沒而祠于鄉賢母茹氏公生七歲而喪母
幼苦孤卽刻厲讀書性穎異作文有奇思長補學

宮子弟工舉子業聲名藉甚遂舉正德己卯鄉試
高等登嘉靖癸未進士第初授行人司行人每奉
使巡歷務咨訪以廣聰明一切交際餽遺皆峻却
弗受自筮仕其志操已可嘉尚三載考績擢江西
道監察御史風裁自持侃侃有忠直氣嘗抗疏論
大獄之冤忤權貴意遂得遷謫任廣西思恩縣知
縣縣故夷俗甚僻陋殆不可居當道議留之省城
將別委用公義不可曰吾豈敢隳職守以玷官箴
力辭赴任至則撫循其民制里甲立鄉校以詩書
教邑子弟夷俗少變公精於吏治而緣飾以經術

故民服其教而安其政凡再期月遷湖廣均州知州內有太和宮置中貴人以掌錢帛往往侵州治濫受民詞爲奸利事公嚴爲禁革不少假借中貴人亦憚公威名亦知斂戢不太恣肆民賴以安其施德用威類如此未幾轉福建延平府同知治益精明攘奸剔妒吏胥畏若神明無敢有舞玩者剖決如流獄無留滯尤留意學校每進諸生講明聖賢性命之學亶亶不倦一時聽者皆充然若有所得在延平甫月餘郡志載其政績列于名宦及陞廣東按察司僉事整飭潮惠兵備肅清憲度以激

揚爲已任豪右斂迹貪官污吏望風畏避尤以培植善類表揚孝義爲先務時廣右多事唯潮惠頗稱寧輯有海寇環逼省城突入虎頭門按院吳御史以勢猖獗議扃城門爲自守計適公以事至省毅然進謂御史曰是示怯也城外之民獨非吾民乎慷慨論列請以身當其衝御史雖韙其言而尤難之公卽領九門匙鑰而出大開城門縱民搬入城先簡機兵靖江禁旣而分列隊伍申嚴紀律晝夜巡視不徹備凡五日而賊退舍又三日而賊遠遯矣御史以功非已也頗有赧色後巡歷至潮

復以禮節相責望將蒞學先期戒驛官置公座側
侍公憤然曰吾豈能徇人以非禮屈已以求庸也
遂辭疾具疏乞歸養不待報而行公爲人彊毅能
自卓立深沉有謀而善果斷負經濟才以言事謫
下寮不一二載而秉憲節士類方期其大用竟以
抗直不諧於時退而家居烏石翁尙無恙承顏順
志期以善養不苟爲阿諛自以累世宗子廼立大
宗祠以祀其先四時祭享一遵古禮親族有患難
必力爲解分鄉隣有爲善者更加勸勉其爲不義
亦諭之使改或貸之粟資其生理自處清約甘脫

粟之食衣裘不能具襲褐取給而已屏聲色無他
玩好唯日閱古圖書以自娛悅尤好易朝夕玩味
若有神會者遂著學脈一編以爲四聖傳授心法
盡在此書跡其行藏將一準之易而獨立不懼則
公之所得者多矣公生於宏治四年辛亥十月初
三日卒於隆慶二年戊辰十月廿九日享年七十
有八配金氏安人繼室鄭氏安人皆先公卒子男
四人長恆邑庠生娶何氏尚書石湖公孫女次恂
郡庠生娶周氏皆金出次志國子生聘張氏退婚
不娶次念娶王氏新建伯龍陽女女三人長適郎

中王龍溪仲子應祥次適韓尚書莊僖公曾孫傑
次適邑庠生錢經國皆鄭出恆志念亦皆先公卒
孫男五人有祥娶沈氏有政娶趙氏有臣娶汪氏
有謙娶錢氏有盛聘劉氏祥早卒政謙皆國子生
臣邑庠生孫女四人長適知縣黃世厚次適縣學
生俞近思次適謝明次適劉雅曾孫男六人曾孫
女三人尚幼公晚年解悟生死事大委順待終嘗
自卜壽藏立兆於項里嘉西山之原廼今壬申閏
二月十六日其仲子恂將奉公柩歸窆焉從先志
也而以世次行事屬予曰願有述也將以請于當

世立言君子而銘之顧予與公交最久相知亦深
慨斯人不可作而余亦老矣懼幽懿之未章也故
為之撰次如右以備采擇云爾
賜進士出身大中大夫太僕寺卿會稽眷生商廷試

撰會稽郡人獻

五色車主將文四人其意欲得黃也

高精齊趙因自臨陣運因斬早卒

將軍正人自物變亦六首如變

六節名朝生疑避河清讓出

中王賦刻於千載

冲和公配周安人行狀

萬歷十一年以子兌貴加贈兵部尚書周氏加夫人

吾邑稱三四著姓必曰吳氏周氏云夫吳氏周氏豈獨以門閥相高哉蓋有賢士弗耀而其內德亦謹矣兵部職方司員外郎吳君奉其母周安人居京師一日安人以病卒史綬往弔焉職方君號哭痛伏地幾絕矣乃再拜言曰噫傷哉母兌不孝竊升斗之祿侍吾母於官也誠冀以職事事

天子積年歲叨

恩爲吾母壽而今弗逮也噫傷哉抑兌不孝先子前吾母卒二十有八年時兌尚幼葬先子於郡山之

陽未有狀誌今茲奉母氏柩以歸葬將有日焉惟
是二親幽懿脫泯泯無傳兌不孝之罪滋大子史
氏也願子爲之狀於是蒐集新故述行畧授綬綬
次其事爲狀狀曰吳公諱意字士誠號冲和山人
系出吳季子之後自均禮徙居州山遂世爲州山
里人均禮生淵淵生暉暉生璇皆隱德弗仕璇生
封主事一得翁源卽公大父也源生烏石翁便以
進士爲雲南按察司副使娶茹氏杜氏並贈封安
人茹安人生州東君彥癸未進士爲公伯兄公與
弟序班君毅皆杜安人出也公性孝友一得翁治

家嚴少有不憚卽烏石翁貴且老必跼侍終日跼則公輒隨跼多方求一得翁憚乃已其事烏石翁一如烏石翁所以事一得翁者杜安人有疾公視湯藥蚤夜不懈祝天願爲代死敬州東君甚謹而友愛于序班君序班君嘗有疾灼火公爲徬徨流涕不忍視蓋其性然也公故世祿之家而自持謙抑恂恂斌斌親仁愛士然端嚴沈毅寡言笑不肯以阿媵取容悅故與人未嘗有忤而人亦未有不敬憚公者敦樸履貞自奉甚約至推羸振乏卽厚費弗爲靳鄉之人有疾病歿喪不能給者必爲求

醫藥治瘳具其資無以學者爲助其資使學人至
于今稱之不衰公幼業舉子會烏石翁致政家居
多日病而杜安人又貞疾不能起公早暮侍左右
代理家務因學道弗復以仕進爲念然能文善書
動師古人教職方君兄弟飲食步趨咸有法程孜
孜未嘗厭怠病且踰年每旦必起冠服閱史記諸
書嘉靖丙申十月十六日卒卒之日猶晨起正襟
危坐口吟唐人詩蓋其嗜學如此獨弗爲章句之
習爾也距生宏治壬戌三月十五日享年三十有
五云安人姓周氏父禕以國子生爲河南鄧州吏

目從兄翰林檢討諱正者與烏石翁爲同年知吳公非凡兒遂許婚焉安人母沈氏嘗病且危會亡銀茶盃幾安人懼母恙益病乃密置其幾於他所佯索得之以慰母心時安人尚幼在室也日勤女紅讀女訓內則卽家人鮮得覩顏面者蓋已並稱爲賢女云年十六歸于吳吳公故孝友而安人實克佐公公蚤歲蓄烏石翁俸錢增治產業均授之叔氏又或出所有助叔氏安人一不爲難間至脫簪珥取盈焉公侍杜安人疾安人必與俱拊摩扶抱溷穢不避夜則往來戶外俟動靜輒達旦不就

寢已而公有疾安人又善事公比公卒安人方年三十有一撫諸孤慈而能嚴時時稱說吳公所蹈履與其所志曰汝曹其敬繼承之時職方君向學勤安人每同寢起卽盛寒暑不少間布素茹淡拮据勤生至奉舅姑滫瀡襦裋必極穠美爲職方君兄弟延師友供具必豐四時饋奠必躬滌濯羞餼庶蒸蒸敬無怠居常內外女媠宴好絕不往來曰而孀婦宜爾也己未職方君成進士以使事省覲遂迎養安人于官安人之在官邸也嘗語職方君曰爾初入仕路勉自樹立弗隳厥官吾辛勤教爾

賴先人之靈以有今日爾清白吾願足矣勿以吾老故求奉吾甘溫爲安人識大義教子有道其遇事訓戒多類此癸亥五月安人忽疾作八月十六日卒距生正德丙寅正月十三日享年五十有八安人之卒也蓋以胃病云初吳公卒時安人痛盡欲偕死杜安人泣謂曰吾老賴汝養諸孫初孤賴汝育以長汝死汝夫死不瞑目矣死何益安人乃勉從命蔬食水飲者三年已而相繼終杜安人烏石翁之喪卽絕口不復肉食職方君每勸之食安人輒愀然曰我不卽死相從汝父於地下者以杜

安人之命未醜也今二親既就葬爾曹稍稍有成
立吾誓蔬食以待死耳爾弗復言至是竟以胃弱
弗可藥嗚呼安人良亦苦心哉公生子男三長悅
以國子生爲高要縣主簿次卽職方君兌次充國
子生皆安人出孫男三有麟兌之子有豸有獅悅
之子孫女七史綬曰夫吳公豈不誠隱君子哉顧
獨弗求于壽天其使詒穀于後之人者深長矣乃
安人卒能成其志佑啓賢允驥驥以昌而職方君
尤以文學行業著稱士大夫間榮進未量然則公
與安人之懿固將益彰且顯也卽綬不爲狀豈遂

無傳重違職方君請謹筆之如右俟徵銘於立言者

賜進士及第翰林院

國史修撰纂修 大誌分校 大典同邑諸大綬謹

狀

清溪公配孫孺人墓誌銘

清溪吳公諱翊字士輔公之大父源以長子憲副
烏石公貴封刑部主事源次生公之父桓博習羣
書六應試以文學行誼名桓娶傅生子二長靖蜚
聲學校公其季也公生而簡重凝峻嬰孺之良至
長不墮壞始習制科業以多疾遂棄去清願恬曠
脫出塵壒之上力行節儉爲子姓先至奉二親飲
饌必豐潔盤盂器具咸置以銀曰孝養得爲宜爾
也構一宅渠渠然壯麗曰遵二親遺命以累世積
善望子孫昌大宜爾也造次未嘗疾亟作息具有

常度恂恂似不能言終其身不談人過每犯未嘗
較或有搆不質於有司而質於公其風誼遠矣晚
年尤好文史兀坐長吟夜分忘倦呼童取苦茗咽
之不知清風明月與我之爲三也二孫有朋有朗
者幼而孤也撫育訓戒靡所不周遣朋赴禮部朗
赴南雍各肄業公渡錢塘見嬰兒溺憫然亟拯之
適笛亭拾遺金侯忘者至而返焉人稱爲至德云
餘表表者難以枚數郡邑士大夫欽慕素履舉鄉
賓奉

恩例受一命榮往公嘗自卜壽藏於河塔大山得飾

布待期意公起居無恙一夕與姪少保環洲公條
後事遺之二孫皆立身守家諸大要言畢從容委
化又可謂考終矣時萬歷癸未十二月朔也距生
正德戊辰八月八日享年七十有六配卽孫孺人
同邑朝列大夫孫公微女賦性貞靜淑慧克遵姆
訓因伯父烏石公年家而獲配焉共事舅姑凡寒
暄甘旨之節溫清定省之儀靡不殫力爲之至延
賓客處妯娌均施予肯堂構百順以成夫美躬勤
率下雖老不廢蠶績庶幾哉雞鳴昧旦之風撫摩
二孫抵於成立生於正德庚午五月十四日卒於

萬歷甲戌四月十七日享年六十有五合葬所卜
之區生子男三長冠娶少尹韓公沛女例授將仕
郎先逝次冕旒俱未娶卒女一適前梅太學生周
棻惟冠遺二孫曰有朋有朗者朋娶管壑趙公遂
女朗娶華舍太學生趙公奎女曾孫男聚奎娶在
城陳公柱女曾孫女三長聚順適華舍中書趙公
貞明子慶成茲二孫將以甲申十二月十九日奉
公柩合窆焉而持少保公所述事行乞予銘予與
公締姻熟知公不獲辭而誌之因銘之曰

於維我公

德儉而隆

持身以約

奉親則豐

孝祀肅肅

燕處雍雍

達尊兼二

爲世所宗

儀刑望族

賓享鬯宮

孺人勤懿

一德自同

峩峩河山

土厚而崇

二靈永奠

芝蘭外叢

孫枝芄芄

允昌我公

賜進士第大中大夫貴州按察司按察使前刑科都

給事中同邑沈寅撰

鴻臚寺序班致齋公行狀

嘉靖庚申五月廿三日鴻臚致齋吳公以疾卽世
官邸音至于家其長子汝信忱窮日夜哀號馳訃
月餘謀柩南旋懇余以狀云先君無祿志行猶存
存亦賴之於記載也尙爲我述之公先世出自富
春淵源實同梓里昔余游越得與汝信聯席來及
京公已居鴻臚又幸與公從子環洲兌午未皆聯
榜則家庭模範
朝宁羽儀余旣知之素矣蔓蕪不足以揚令德發幽
光然世屬通家辭之義弗克也夫吳爲南越巨族

冠蓋輦出簪纓公之先大夫烏石翁位歷憲副徽
音茂舉嘉德厚植庇蔭于後篤生哲允公實烏石
翁之季子云公自幼賦性純確資稟明敏仰承家
學必以拾青紫繼闕闕爲期霜蹄用蹶雲翼時垂
遂挾策入成均友天下士猶冀榆川之一決也奈
時終不偶豈非命也夫或勸之仕且語之外焉公
云有司誠可近民布德若奔走服役弗之能也得
列清閑庶於家聲爲無玷耳于是就鴻臚序班上
近

天子之光下肅百僚之禮正謂束帶立朝者抑在茲

矣此其進取雖不足以才猷經畧然行義修潔箴
規嚴整彬彬乎振鷺之風也烏石翁致政數十年
優游林壑公承顏順志愉愉盡樂逮烏石翁捐館
壽登耆頤公亦二毛矣洙泣踰禮若赤子之失怙
者慤焉集芻之思也公伯兄僉憲州東公志行剛
方公委曲執弟道仲兄冲和公早世撫育環洲諸
孤視已子無異今環洲輩俱有成立公造就之功
居多也雅著棠棣之咏公實有之矣公配湘湖之
來耦合巨族然勤儉宜家德亦侔也閨門之內相
敬如賓每以鷄鳴相勸率焉詩首關雎之義公實

有之矣公諸子皆卓立遠器足以繩祖武而繼芳
躅者公撫字均平專一卽無偏昵至過庭之訓必
以義方匪徒文藝功名之是逞也雅有豐芑之謀
采菽之圖公蓋兼之矣公之家居處族持已與物
由幼而老自士而仕弗克枚舉大率惇倫重義真
誠簡易可以却浮靡而挽流波者也夫種德宜顯
積善宜延理有固然者奈遘疾彌留歛焉大漸官
止鴻臚卽年終五十疎戚所以痛心遠近爲之振
愍者豈不以高才而無貴仕卓行而靳上壽惜公
之不食其報也余謂冥兆秉賦混成自然修短窮

達厥有定數公脩身聽命稟受全歸寄一命以行
志躋五十而非天視彼敦倫隳行徒生于世者方
斯蔑如也矧汝信諸君皆克繼前烈用著徽猷餘
慶之衍綿綿未艾公之歿也猶生之年矣昔謂仁
者不必壽而又有後之言惟公之謂與公諱毅字
士遠號致齋生於正德辛未八月初十卒之日嘉
靖庚申五月廿三享年五十公祖一得公源封南
京刑部主事父烏石公便雲南按察司副使兄弟
三人長州東公彥廣東按察司僉事次冲和公意
余之年伯也次卽公配蕭山典膳來公宏吉之女

子三長卽忱郡庠生娶阮港太平府經歷唐廷諤
女次沈娶白洋陝西都司斷事朱以亮女次恂聽
選官娶張漣胡岳女女一適會稽陶大受孫男五
長有璉有臨有觀有璉有鼎孫女三長許劉上舍
炬長子劉璉嗚呼公之美行彰彰昭著余不敏不
能具悉聊以汝信之懇述公歷世行實以俟立言
大君子之采擇云謹狀

昔

嘉靖歲次庚申秋七月望日富春進士年家晚生

周美頓首拜撰

明故登仕郎鴻臚寺序班致齋公洎配來孺人合

葬墓誌銘

鴻臚公之卒且葬也又十五年而來孺人卽世其子汝信輩卜以今年春二月合兆先期緘富春進士周君肖一諱美所爲狀及來孺人歷履疏懇銘墓前之石余胡氏與吳世締姻好且余與公冢子汝信君忱聯席最相習旣又與公從子環洲君遊因得覩光霽焉是余知公宜銘公也遂按狀書之公諱毅字士遠致齋其別號也吳之先代有聞人具載

封刑部主事一得公洎憲副烏石公誌表中憲副公

娶茹安人生長子州東公彥僉廣東按察司事繼

杜安人生二子冲和公意

贈副都御史次即鴻臚致齋公公孝友性成而慷慨

有大節遊庠校時輒擊筑自言曰大丈夫生世當

為天下造福不爾亦當經緯禮樂安能坐丈席中

白首伴蠹魚哉遂效相如人貲為國子生體度凝

重言論篤雅且坦中無城府故所至皆飲其和而

樂與之游乃其事憲副公洎杜安人也承顏順志

務得其懽心各躋上壽而數十年優游里第無他

恙者公之孝養具也迨居喪哀毀特至浴斂鬻舍
皆身親之獨伯兄僉憲公性剛介則溫承曲順無
幾微不堪邑族人有高年者時飲食之有貧乏者
時賙卹之其大節率類此至治家每晨興課家僮
雜作墾上茹麗食淡終身不畜一媵侍而延師教
子則傾囊勿恤有施貸於人卽負之亦不責也已
而相禮鴻臚日疲拱侍客有愛公者曰外任頗自
如以有力者請之易得也公正容謝曰吾旣不能
汗馬陰山以立奇勲又不能擗辭藝林以取上第
顧欲避勞就逸以爲一已便縱非壯夫亦弗爲也

然而卒以此斃京邸聞者無不涕泣然下謂公孝
悌而忠誠若此則宜食何報哉獨奈何旣裔其位
又靳其年也乃今子若孫顧翩翩然起識者已知
其食報於天非淺鮮矣公之配爲來孺人來故蕭
山名族而生孺人者則裕齋翁以善良著者也在
室故豐裕及歸公勤儉孝敬庶幾哉鷄鳴昧旦之
風初不知爲貴家女也杜安人尤愛重之時鴻臚
公微有不當意孺人輒多方諭解而教汝信輩則
愛而知勞嚴過鴻臚公故各成遠到噐是孺人女
也而兼子之孝婦也而兼夫之勞母也而兼父之

巖然則鴻臚公之大節豈獨其凜然哉要孺人之
賢有力矣方其扶襯南旋也茹痛襄事而心神則
忽忽不樂遂淹歷十餘年而殂今將附窆於魚罩
山焉公生于正德辛未八月十日卒之日爲嘉靖
庚申五月廿三日享年五十孺人生於正德己巳
二月十二日卒之日爲萬歷乙亥三月十四年六
十有七子男三長忱卽汝信娶阮港府經歷唐廷
諤女次沈娶白洋王府審理朱以亮女俱監生次
忱娶張漣胡岳女卽余姪女也爲雅州吏目女一
適會稽陶大受孫男十一人長有璉娶在城理問

王朝暘女次有臨娶柯山監生張仕宏女有璉娶
在城庠生沈觀海女有觀娶賓舍庠生錢宗軻女
有若娶儲墅省祭官陳廷諫女有鼎聘華舍監生
趙守貞女有漸聘牛頭山監生李應麒女有師聘
賞祔監生徐思遠女有璉聘峽山郡庠生何繼曾
女有升聘夏履橋監生高汝賢女有益聘項里徐
孫女三長適在城監生明渠子劉璉次適在城應
天府治中亭峯子虞寧次適在城監生進吾子王
如璧曾孫男一曰煒曾孫女一婚配未定嗚呼屈
指品天下士若公與孺人可多得哉余固著此令

後之砥行君子得以世世憑焉而因系之銘曰

驥伏於櫪

其材則餘

輻寘於河

其器則儲

公與孺人

鎌金璞玉

不鏤不琯

光完山谷

天道平分

一消一息

鳳毛聯翩

賁茲幽室

萬歷四年二月吉日

賜進士通議大夫湖廣按察司使眷生同邑胡邦奇
撰

聖山公墓誌銘

公諱嵩字士高別號聖山其先源於延陵季子歷世逾遠難以殫述近自洪武初慎直府君相陰陽擇山川之靈秀而創業於州山焉後果繁衍昌熾其仲子潛生旻及鉢以至於僕與謹父子相傳歷六世矣皆倣儻豪邁富冠一邑謹生公公少而穎異父慨前世潛德勿耀乃課公舉子業公自分矢心不專憚然改圖曰我非封侯骨也遂投筆肆力于田園山澤之利取以封殖其私惜乎誠實有餘而智巧不足算計每不見效然亦充然自得不以

此瑣瑣者介意也公天性孝友其事父母必加愛敬而服用膳羞無不豐潔父翁中年遘疾粒米不入口者近半載公遑遑然憂悸靡寧而於醫藥祈禱之費必差而後已母先父卒哀毀至于骨立傷父之老而鰥也朝夕存問慰安之匪懈父恆德之常語人曰我諸子皆順而此子尤爲最焉兄弟分析財產一遵父所命不費口以爭多寡公之孝友可謂無間於內外言矣至於自奉甚菲薄而親朋至必盡情盡歡遇長者則必貌恭禮肅而言不造次待兄弟儕輩則坦率平易而言笑亦不輕忽馭

臧獲則以寬以恕常曰寬以養其力恕以安其心
其待先世舊戚尤必加厚或不足於衣食而時來
稱貸者或無所歸而來就養者悉施予而慰止之
不吝所費富之十倍於公家者乃其的族曾無覬
覦希慕之念但曰人各有命吾惟安之而與造物
游也故百凡拮据之勞靡不身親歷之有暇則投
竿取魚遇酒則酌之微醺不至於亂性遇棋則奕
之適興而止亦不耽也一或羣居亦不立異雖譴
言不至忤物如行雲流水無滯于迹若遇堂堂正
論必據理核實不與人浮沈其有不合於迺翁者

至詈之答之亦不顧此其賦性耿介無所回互若
此故人無親疎大小咸愛慕焉公始娶張誠女繼
娶魏女俱早卒至于今與其家通好不絕可以
觀義矣繼娶徐質女卽雲洲公之母也雲洲生而
聰慧公悼已之不遂父志課子甚嚴至十一二輒
能文且清雅人皆以偉器奇之夫何三就試於宗
師而一不利於棘闈父譴之曰汝不能以文而顯
親揚名盍就武試之弓馬韜鈴卽閑熟一舉而遂
魁天下大爲主司所稱賞未幾

穆宗皇帝敕賜備江西矣時流賊猖獗公甚憂之誠

曰汝年雖弱冠而諳練未熟膺此重任奈何我教
汝以四字勤儉恩威一不可闕惟勤可以集衆務
惟儉可以養廉節惟恩可以得士卒惟威可以使
行陣不退怯後雲洲居官一如所戒果能節厲冰
霜整飭武備作三軍之生氣而剿彊敵於呼吸間
矣時撫按奏績當守行將有內簡之命而公已溘
然逝矣公內文明而外柔順貌謙虛而心直諒言
必恂恂行必侃侃開心見誠不設城府與人無爭
表裏如一不意尊賢尚功之俗而有此純德君子
若是者乎歿之日士人走弔如狂三軍垂泪如雨

人之歸仁如此傷哉其壽之不永也雖然有雲洲公爲之子雖死猶生也安在其壽之不永也公生於正德辛未九月初九日子時卒於隆慶庚午二月初五日未時享年六旬男一卽顯忠戊辰武進士金山參將也娶貢士劉緯女孫男一名立德聘三江所參將韓沛女公卒於官署時雲洲有僉事滇司之命矣扶柩以歸憑限促不及葬浮於菴里山之麓今相地於乾溪青龍山之陽將於己卯年二月初九日襄事雲洲持狀持幣且拜且泣泣已言曰顯忠不祿禍延先考制行大畧已備諸狀請

君一言銘之以納諸幽余雖不敏辱親雅與雲洲
公同寅楚服知之素矣奚敢辭且得托名於令士
墓石以垂不朽不亦幸哉是爲銘銘曰

於惟我公

純懿天植

貌和而充

性慤而實

無諂無驕

不跼不躄

茁哉賢允

公德所積

花誥重勳

賁茲窳窳

慶餘吉人

貽厥千億

龍山之陽

我公萬年之宅

賜進士亞中大夫山東布政司左參政眷生陶大順

撰

東泉公洎配鄭氏墓誌銘

東泉吳先生配鄭氏安人日月有時將葬矣余弟
繼祖辱先生東牀持其狀丐余言余與吳忝世姻
誼不容以不文辭遂按狀誌之先生諱大宗以叔
紀字東泉其別號先生裔出吳公子札之後歷世
慎直公始家州山七世而先生曾祖錄祖佑父詢
母秦氏廣西按察使司副使銳長君珮嫡女先生
先世厚貲累鉅萬往往周饑饉埋暴骨富好行其
德積仁累行其世德也先生生而純篤幼習制舉
業奇於數屢試不第內外艱踵繼哀毀骨立實亂

方寸遂輟學任家政昆季六人先生其伯也在疚
後諸弟未婚者四先生不吝捐貲畢其姻教子弟
延名師嗇於自奉而優師傅極力豐腆家居重禮
教訓戒子姪諄諄悉軌於度長幼肅然遇外侮必
同心禦之族有伯姪構釁幾滅倫諭長男和解之
卒完骨肉戚族多貴倨曾不一染指借其輝雖至
寒弱未嘗有茹心宗黨欽之無瑕瑜之口生平檢
狎甚嚴守墨修繩毫無踰越以故壽踰古稀而不
一失足於公庭其素所樹立如此厥配鄭安人鄭
固唵之世族廣西潯州知府如意嫡孫女也未字

時素閑於內則及嬪吳章於婦順相夫子敬戒惟
謹事舅姑以孝名秦氏安人最宜之妯娌怡怡無
間言鞠子女拊搢顧復不憚勞瘁俱至成立先生
殤子哀痛染痼疾而年幾古稀則其豐於柔德而
慎於善攝也先生生於正德十四年七月十八日
卒於萬歷二十一年閏十一月初三日安人生於
正德十五年八月廿八日卒於萬歷十三年二月
十七日子男四人長履道衛庠生娶白氏次遵道
娶李氏先先生亡次致道娶陳氏次裕道娶郁氏
女一適峽山尚書何照孫主簿繼祖孫男九人必

慶渠公行狀

公諱大受字叔謙別號慶渠世傳吳公子札之裔作祖於越之州山始自慎直公慎直公生潛潛生旻旻生鈺鈺生佑佑生詢詢卽公父也母會稽梁祊秦氏廣西按察使司副使銳長君嫡女也公生而醇慧性好學而戀戀於定省萬竹公曰吾家世業儒爾曹當以遜志爲承歡勉旃公承命惟謹宵旦編摩工博士家言父兄師友咸以國器奇之屢賞鑒於郡邑之長而竟三北學使司命者豐之稟而嗇之遇也髫年艱內弱冠艱外哀毀樂樂至於

病瘠昆季六人分貲產任受捐瘠居身夏屋讓季弟求居側室最陋者逮季弟病劇公躬醫藥不解衣者踰月適季兒猝危病厥配陳孺人泣曰忍使孩危旦夕不面父也公曰無祿吾弟痛甚刲心嬰兒托命在母竟呱呱不顧其友愛如此公素患羸弱而陳孺人亦賢淑多疾因究心岐黃悉力救藥迄無寧日生平相敬如賓命長男及季負笈不惜罄資延西席西席窶乏祀爲具齊犧掃其先塋強仕時竹峯秦先生訪之曰以君才奪標何嘗承蜩而老泉石乎公笑而不答莫逆有當路者或勸謁

之公曰世路燠寒時易安能夏畦於要人之前乎
焉知不竭人歡也終不一染其指吳宗素望於越
書升陟危者代有新進競於跣跣公曰吾人卽名
不挂仕籍咫尺天威獨無兢兢於當世之禁云厚
自挹損罔越尺度沒齒而公庭無屈體焉則防檢
素也居恆室書爲善最樂以見志時輯賑濟救施
活生利物各目彙成帙惟以副天心詔來裔非緇
黃結緣之謂公中不勝衣訥訥不出諸口嗜好迴
別儕俗崇朴素厭澆譁慎調攝惡浮白愛詩歌疾
聲妓闇然修已之姱不摘人之短淡然食已之貧

不冀人之有身羈野老之間口誦先王之風百家
六籍罔不披吟而談各理必稱孔孟曰吾道自足
何事旁求一切左道極口詆之終其身不失足於
空門迨病革猶曰吾今益信輪廻禪談果妖妄也
遂呼長男曰吾以保身勤學孝友三事爲爾著蔡
不他及可謂得正而斃非耶日者自擬所以易其
名者曰端曰誠曰實至蓋棺論定鄉人稱篤行君
子焉而識者已覘仁人之有後矣公生於嘉靖丙
戌十二月十九日亥時卒於萬歷壬午二月十二
日戌時享年五十七禩配諸暨店口陳氏福建浦

城儒學訓導泰嫡孫女也子三長時中庠生娶邵氏次粹中娶王氏次憲中庠生娶章氏女一適會稽章如約孫男長蒙正次義正餘幼未各外甥宗藩宗垣宗屏宗翰俱庠生今萬歷戊戌十二月廿二日時中等扶公柩葬於前望山之夕陽而核公行實丐余言垂不朽余與公連袂十載雅向往之稔悉其履也故不揣不斐爲著述如右以俟立言君子

賜進士奉政大夫河南按察司僉事眷姪黃猷吉謹狀

明威將軍薊鎮榆木嶺提調署指揮僉事巨川公

行狀

公諱大武字叔文別號巨川系出季公子札之後
代有顯人而卜居於越之州山村自慎直府君作
祖焉閱七世而生公公生而穎異幼習舉子業爲
博士言甚工以數奇北於學使因遷業武科當

世廟歲戊午領浙闈鄉薦辛酉領南闈鄉薦遂登壬
戌會榜授蘇州衛嘉興守禦所鎮撫備倭江陰冲
年練達隄防戒嚴海氛肅清當道噐之咨送遼東
軍前贊畫已隱然有邊才之望矣

穆廟時三衛昂首見告戚大將軍繼光用公計馭之
昂首誓服適蹇中丞公達閱邊飭墩烽核兵廩軍
中訛言減糧南兵閔然鼓譟蹇公錯愕公承令招
撫宣諭意旨勉以忠義衆皆感泣地方安堵臺臣
以聞遂有提調榆木之

命公銜

命虔職勤撫楮簡偏裨足芻糧邊墻城墅不難雨雪
程督而尤優卹哨探苦役得其死力以故具知
情出沒狼烟不驚榆木遂屹然爲薊門重鎮無何
而昂酋又見告矣主將堅壁自守公曰無戰心

第要賞耳宜一大劊示怯非計主將難之公請以
身膺其鋒卽率精銳千餘營關外躬擐甲冑擊刁
斗整行陣以示必歿見勢不可犯遂宵遁臺臣
交章薦之遐邇方倚以爲重而竟以倖直寡諧爲
姦鋒所中於時軍民僉以不克借寇爲恨公沉毅
有謀諳兵機熟情故建威銷萌隨試見功儻得
老氏之精而用之者生平食不二味衣不重采而
悉養廉需躬甘旨極膝下歡撫昆季鞠猶子貌諸
孤成立不惜罄囊絕無好貨財私妻子念此尤其
超然異於儕俗而鄉鄰宗黨嘖嘖交口稱以爲難

之難也者蓋嗇於嗜欲而篤於孝友其天性然也
家居杜門不喜見人惟閱古書以自娛採摭格言
纂成帙名曰悔學纂言曰吾用之終身盡在此尤
不惑於堪輿家說卜葬考妣昆季聚於一所一切
倒杖卦例之術屏而不用則所信篤也其質行有
如此者公生於嘉靖十七年戊戌四月廿六日卒
於萬曆二十六年戊戌十月初四日享年六十有
一父諱諤母周氏厥配周氏生女一適在城水澄
巷劉重側室楊氏生子禹道娶道墟章氏幼女未
適公卜壽藏於本里宋家山其猶子景桂震於己

亥年二月奉公柩歸窆焉從先志也而傷公行實未傳居恆鬱鬱歲乙巳以世次行事丐余言余忝親誼忘其固陋爲著述若此云

賜進士中憲大夫

欽差福建巡視海道按察司副使前奉

敕提督山東學校典試東粵會稽眷侍生劉毅拜撰

明威將軍昌國欽總署指揮僉事近洲公行狀

公諱大學字叔行號近洲始祖慎直府君卜居山陰之州山村世有令德閱六葉而生公父古齋公諡爲邑庠名儒古齋生公公天資高邁幼習舉子業好左氏春秋研精索隱晝夜不輟有杜當陽之癖故所爲文亦高古不欲循時蹊然坐是不爲人識數奇弗售因拊髀而嘆曰丈夫寧碌碌隨蠹老螢乾以沒世哉遂改就武業當

世廟歲辛酉甲子及

穆廟歲丁卯三領浙闈鄉薦而古齋公謝世公躡踊

山陰州山步居詩 卷一
哀慟餽寢俱廢蓋忱孝孺慕乃其性生而于含續
告窆諸大事匍匐慎終莫不如制宗黨稱知禮焉
萬歷丁丑成進士授紹興衛右所鎮撫克效其職
陞寧波昌國欽依把總公曰吾雖讀書不成而深
明春秋忠孝之義今既荷

國恩卽當黽勉思所以報

君者又痛父早歿不及見捧檄懽小人有母亦正吾
遺羹奉養之日也遂奉母謝安人蒞任定省視膳
自是優游祿養者十餘年然則公雖以兜鍪起家
而學醇品粹豈淺淺學究輩所能及哉甬東邊海

公夙夜嚴慎簡練軍卒儲峙糗積戍士飽騰咸樂
爲用公寬嚴相濟恩威並施故其下無骫法者用
是海氛肅清人誦儒將兩蒙鎮撫獎薦能不負其
夙學云兄弟七人公居其六父遺產業悉推與同
氣作六股均分不存分毫而自所得祿入亦時分
給以敦友于之誼姪七人視如已子婚娶皆爲資
助是其孝友因心非勉強也倡隨間敬如賓客閨
門整肅鄉里化之歿之日囊無餘貲嗚呼若公者
其可謂篤行君子歟方公駐防海濱時有誣報沿
海漁戶七人爲海寇者意欲冒功邀賞已擒解總

鎮軍闖誣服將刑公奔叩臺前詳辯其冤力保得
釋嘗自言曰吾居官無他善狀惟救此七人之命
而已公之後必昌蓋可必焉公生于嘉靖己亥九
月二十日萬歷辛卯六月廿六日卒于官署享年
五十有三配韓氏同邑韓成女生子六長有煒巡
檢次養忠三用宣中萬歷庚戌科武進士授南贛
巡撫中軍都司四向忠五懷忠六貫忠孫男十人
長周鎬中萬歷戊午辛酉武魁授浙江南關欽依
把總次之林中將材科武舉三元遇邑庠生餘幼
未各有煒等扶襯歸持狀次公行事且拜且泣乞

言于余余忝姻誼不以不文辭謹爲譔次如右以
俟立言君子之采擇云爾

奉政大夫

府同知年家眷姻弟錢捧盈頓

首拜譔

鴻臚寺序班石洲公朱孺人合葬誌銘

石洲吳公配朱氏安人諡萬歷二十一年癸巳季冬五月合葬大塢覆釜山麓冢男有臨等先期持廉憲沈公寅撰狀乞一言余不敢辭按狀述之公諱沈字汝默石洲別號也其先吳太伯後歷季札至

皇明慎直公始考卜於越州山而宅之慎直生淵淵輸粟千石賑饑

天子遣行人勞以羊酒

敕旌義民再傳遂以科第起身若安溪令公暎給諫

公薜憲副公便侍御公彥大司馬公兌濟美磊磊
吳宗魁然爲越望而便卽公大父也公之父毅以
監胄直鴻臚母來氏安人公生而穎異憲副公甚
鍾愛之伯父侍御公亦視爲偉器長入太學聞寧
國守羅公劄王文成公學而心慕之遂執弟子禮
於其門毅然以向道自期待鴻臚公至孝聞宦邸
訃音幾絕而蘇哀毀痛瘠兄弟三人公居仲分貲
產悉聽於母命怡怡如也家居距祖宅里許日定
省其母奉甘旨居母喪如禮其孝友如此公以世
祿家用度倍饒而自奉至儉鄉人有稱貸者不規

其息而與之甚有焚其券者一日天雨雪甚視其鄰族不舉火者衆親賫粟百石周之而毫無德色適盜遺櫃於秋湖之滸爲家童所得公檢器物訪其主歸之延師教子嘗曰讀書豈必賸仕做好人不愧先人於地下足矣優禮賓客惟不腆是懼第遇匪人若浼焉族譜創始於憲副公續修於鴻臚公至公時族蕃費重議修者僉曰難之公曰吾祖父不朽盛事何惜錙銖竟捐貲獨修三載成帙壽諸梓以頒族屬屈齋贈言稱公仁孝核其素矣公以選事北上謁從兄大司馬環洲公方欲涖任適

染足疾歸政卒年四十六夫懋德如公而奪之壽
聞者惜之厥配白洋朱氏安人刑部郎中登長公
斷事以亮女也安人稟溫良內則素閑歸妹後奉
舅姑至孝善於聚順來安人性嚴毅安人委曲修
權竟宜其心孝聲籍籍倡隨相敬如賓客閨門肅
雍妯娌毫無間言撫循子女知愛知勞恩膏溢于
下雖婢妾賤人無不戴德者石洲公廣業宜家安
人力焉稱未亡者十五壽幾古希公生於嘉靖乙
未八月二十四日卒於萬歷庚辰三月十七日未
時安人生於嘉靖乙未八月十一日卒於萬歷癸

已九月初三日午時生子七長卽鎮撫有臨次有
觀有鼎太學生有漸有師禮部冠帶儒士有升南
京鴻臚寺序班有益指揮僉事孫男二十二孫女
十一銘曰

抱朴以醇

惟公是身

人施人濟

見公之心

孝思永言

公之家聲

疏爵清時

公之令名

思齊婦順

子孫振振

懿德景行

九原耀明

賜進士第通議大夫南京兵部侍郎前奉
敕巡撫應天都察院右副都御史同邑眷生王元敬

中大夫湖廣糧儲道布政司右參政匪躬吳公

墓誌銘

曩者余備官秘書得識今大參吳公匪躬於班聯
中時公方以茂宰舉循卓晉秩柏臺聲施藉甚都
人士皆有高山景行之思余與公傾蓋見其器宇
敦龐丰稜峻整蚤卜其他日建豎之遠大而鐵冠
豸繡斯爲得人公亦懽然結苧縞於余相與班荆
道故始知公先世本籍山陰與余爲桑梓且通門
舊誼也旣而公敷歷閩楚遂致濶疎而公子伯成
令錫山有賢聲余掌銓日飫聞之每嘆羨其作述

之盛及余歸里門則伯鸞溪西子湖祇一帶水口
碑所傳錫侯美政尤悉伯成又以先誼時通問於
余余因深幸吾越之有偉人如公父子也甲寅臘
公捐館舍于潞河伯成以錫人借寇奉

特旨留任守制余往致弔唁伯成乃以狀請曰今歲
七月將奉先大夫靈車窆于阜城門西之龔村願
乞銘辭以光幽宅余惟與公旣忝同里復締兩世
交且舊叨史官表志其職也故不敢辭而按狀以
誌之

公諱執忠字匪躬自始祖慎直公迄六世皆爲紹

興山陰之州山里人相傳爲季札裔五世處士佑
號履素有篤行人謂其操履合於易攸往无咎與
其號符是則公之曾大父也佑生論論生大圭號
越川明世廟時以千夫長領兵隨征關白是爲公
考寓籍三韓蓋自越川公始公貴贈祖父如其官
祖妣秦宣妣王皆累贈太淑人公少穎悟多讀書
歲乙卯年十四甫遊于庠而我祖于時其
太祖武皇帝師克清河公時方冲齡器宇明敏膽識
宗過人立以去歲勉人長壯精於委曲夙蒙
太祖見之邑喜命侍

太親藩佐理庶務時

宗社初立用法嚴峻人易犯誅公委曲周護多所獲
太全親舊有流離散亡者公咸收卹之仰食於公者
數十餘家其子若孫多冠裳接踵于朝其最盛者

辛高二氏焉乙酉扈從

世祖章皇帝定鼎燕都首開制科公本宿儒欲辭職

就試

親王慰留之丁亥以貢士令豐潤豐固巖邑臨海
民悍難治而畿輔當新定圉占紛紜氓庶奔竄公
撫綏招集之力課屯墾軍民無競中澤哀鴻賴以

棲息凡四載閩井間樂利如故不知爲亂離之後也最報

世祖深嘉之召拜侍御史公曰吾用所學試烹鮮焉而效今卽以宰邑者宰天下當無不可但開國之初宜用重典安國之道必在施仁吾旣得爲言官不以此入告其若

君恩與民瘼何因連疏建白有安民止殺用人慎刑諸奏皆得報可蓋公之慈祥寬厚出乎至性故遇有可爲無不本此心以行古所稱豈弟君子公足當之閩寇竊踞邊海蹂躪生靈

廷議推公才以布政司參議備兵漳南公聞命星馳單騎莅任審度形勢籌布機宜是時賊方踞漳州驛騷于泉屬之惠安南安同安等邑結窟安平鎮爲洋舶門戶我師雖布置雲屯賊勢益張而其前衝鎮黃公梧擬棄賊以海澄歸我

朝遣其將賴玉暮夜投款於公當事者疑賊詐不可信欲勿從而公獨斷以爲宜許蓋自蒞閩後卽密加偵候熟察其情稔知黃以揭陽事與賊齟齬其歸命也甚確故毅然請以百口保之極贊其事于是始得持允而公輕身操一葉孤舟先趨海澄而

黃果出迎相與入城大兵繼進澄邑克復賊將甘
輝等舟援不及漳南得歸我版圖焉是役也倘非
公之明決力主策應則此夕黃公之計弗就而圭
大海之淪于塗炭寧有艾耶後黃公拜世爵勛勒鐘
鼎而公終身未嘗自矜伐迄今土人能詳言之公
每謂殲賊務先繕兵兵枵必擾于民民窮必歸于
盜故多方措給廩饟軍無呼庚復廣發招諭凡梃
而走險者皆嚮化來歸山澤菑疇藉以寧輯公又
請於（此處文字模糊）請於（此處文字模糊）
王各營伍中所俘掠老弱婦女悉令縱出給以廬

舍薪米召其親屬識領完聚所全活人父子夫婦
數萬餘嗚呼公之德於閩民不亦深且厚哉丁酉
陞山東按察司副使懷隆兵備道己亥又遷湖廣
布政使司參政督理通省糧儲皆以公長材可當
方面之任也西山之役郝李諸孽嘯聚盤踞大肆
陸梁先是提軍董學禮戰北一軍盡覆有言及公
天子震怒勅三省彙勦兵集如林所需餉億萬計皆
仰給于公楚地遼濶又山溪道阻轉運維艱公竭
蹙持籌至廢眠食嘗以兩晝夜成布囊萬餘飛輓
而前時大將軍握兵臨陣方以量沙煮弩爲慮而

輸解踵至峙乃糗糧壘壁懽呼士氣倍勇遂奏克敵之凱大將軍曰吾向聞吳參政才乃今信之是則公之功在閩楚者不必汗馬揮戈而其濟世保民可云偉矣公爲人溫謹言不輕發恂恂然儒者而臨大事成大功莫不條理整練經濟裕如其理家政亦秩然有度余嘗見公構居室築丙舍自旦迄暮必躬親督視竹頭木屑皆爲有用故所營建輪奐堅緻而無浮費才之足以濟務若此

當宁嘉公能其官

馳封寵疊而公澹於榮進竟乞休以歸議者謂公

齒未懸車強敏猶昔何遽有東山之興公則以官
三品壽六袞爲已足且云吾一綰臺章三監藩政
報

國之忱自謂無忤矣今吾子年少方浮沉州邑間
非及此時親往課督俾爲循吏不幾墜我家風乎
故解組後來遊于錫見伯成所以令錫者悉彷彿
公所以令豐而裁決大務局幹宏偉尤與公意合
迺大喜慰曰後起如此吾可以老矣歸都門優游
于泉石禽魚者將十年長公旣能式穀仲季嶽立
俱有義方抱弄諸孫大者賜硯小者含飴天倫樂

事皆備嗚呼箕範云嚮用五福如公可謂得全者
歟生平無躁妄蹊刻之舉人之交公者如坐春風
而飲醇醲卽下逮臧獲輩從未嚴加答撻不率令
惟薄傲而已雅好周恤人親故隣里時被煦燠待
幕中門下士慰勞解推不倦且每先意代籌不俟
彈鋏至推惠宗黨尤竭誠愛常自以生長于遼念
及祖居則黯然而歎初入關卽訪招族姓至是宦
成亟遊越里掃封塋仰堂構歷詢耆舊故事登陟
先人釣獵遺址低徊留之遇子姓輩雖襁褓而笄
簪者俱歡顏把臂致款曲本支之誼藹如更多助

給嫁娶喪葬之貧者今伯成之于族誼特殷也實推廣公之遺念云從兄有三孤公爲衣食教訓婚配之及其孫亦一體撫鞠皆恃以成立然公薄於嗜欲歷宦無所蓄俸錢出入皆委之掌記紀綱而不問焉雖流連故鄉菟裘有願終未能於千巖萬壑間購十畝營數椽故清白之風猶詒於令似耳性朴而勤春秋高亦夙興夜寐豪於飲五斗不醉而終身無使酒過坐是淵靜克享大年終時稍示微疴卽委蛻以去豈非夙植德本全歸于天者耶歿之日里哀而巷哭越則祀鄉賢以誌典型閩則

建特祠以昭德化卽斲過二泉不過信宿而今泰
伯祠旁猶有頌太公遺愛者其盛德感人可想已
嗚呼余忝閱歷久見士大夫輩以陰鷲宅心深刻
御物者其後必不永福卽當時席豐擁燄一傳而
輒蹶至于衰落不振遺譏鄉邦者比比而是如公
之源遠流長其篤祐寔昌正未可量今于伯成先
卜之矣公生于明萬歷壬寅二月初一日子時終
於

皇清康熙甲寅十二月十六日亥時享年七十有三
歲擇康熙乙卯七月十一日吉時葬於都城西山

龔村之陽謹拜手而為之銘銘曰

親親而愛人二公之仁日致君而澤民有公

之勤裕軍而來弗臣公之勲宜福於其

身復於其子孫斯龔村二公之墳日千年萬

年其永存請驗於斯文

昔

康熙十四年歲次乙卯孟秋吉旦

賜進士出身光祿大夫文華殿大學士兼吏部尚書

經筵講官前吏部尚書奉

旨特召以吏部尚書管刑部尚書事戶禮二部尚書

禮部左右侍郎內翰林國史院侍讀學士左春坊
左庶子國史院侍讀宏文院侍講左春坊左中允
宏文院編修纂修

聖訓

大訓管理

誥勅庚戌科充武

殿試讀卷官丁未科充

殿試讀卷官辛丑科會試知貢舉庚子科武會試主
考辛卯科江南主考年家眷弟仁和黃機頓首拜
撰

福建通志漳南道匪公府君事蹟

吳執忠浙江山陰人遼陽籍順治丁亥貢士知豐
潤行取擢御史遷福建參議守漳州時波海未靖
官署民舍一望如洗執忠隨世子王南下以安民
啓疆爲急一時逃山谷者悉歸井里屬邑道梗飛
輓不繼執忠皆措給之瀕海地方尙懷疑貳當事
以盜界欲虔劉之執忠力爭曰撫之則民虐之則
盜惟上所使之若以海邊爲盜界殊失

朝廷招來德意民間歸者如雲曰有吳公在吾儕無
憂矣尋陞山西懷寧道副使

皇清誥封孟淑人墓誌銘

侍御吳公匪翁生際

太祖武皇帝開基之會夙負偉畧矢志匡時誠五百
年間出之名世也從

龍入都知國家武功丕殫惟根本之圖莫先於安民
飭吏遂棄章京職就文階考授豐潤縣令招徠安
集務穡勸農凡四載政通人和受知於

世祖章皇帝晉擢侍御史歲癸巳適余從中樞謬承
人乏濫竽憲總兢兢以力持風紀澄清吏治爲期
而公秉持清節整綱飭紀亦以安天下致太平爲

已任與余志同道合若夙契然及余歸田公子伯
成令錫山清敏勤慎邑政大理考成報最晉擢清
華余既與侍御公周旋臺署復從公之子叨庇棠
陰誼薄雲霄非特一日相知之雅也今錫山公以
其母太淑人狀來屬余銘其墓中之石余何敢以
不文辭謹按狀淑人姓孟氏父德春公爲遼東東
寧衛世襲指揮使母姓劉氏封淑人皆遼東右族
太淑人生稟懿質幼多警悟年十九來歸侍御公雍
肅有儀祇事翁大中大夫越川公姑王太淑人雞
鳴夙戒不懈於禮侍翁姑左右必審伺飲食寒暑

珍羞漿醴與夫紈紉縫製靡勿當意且身自緯蕭
緝績不恤勤瘁故敬供所嗜無匱乏淑人長於武
功世族之家而夙嫻禮訓蓋其天性使然也於是
越川公暨王淑人甚以爲婦有德能襄內事備古
淑媛之風而才識尤敏給偶試以外事則言必中
機輒有成驗於是凡疑事必諮於淑人益加敬焉
曰他日相夫致其敏慎足遠患害而流聲名吾無
慮矣侍御公奮志乘時大畧宏遠遭逢盛際豫識
天下大勢當奮自遼左必有英特奇謀之士雄武
命世之材雲蒸霞霽羣萃茲土者乃廣爲延攬深

相結納一切家產有無悉置不問以委於淑人淑人黽勉求之躬率婦婢蚤夜勤作家用以裕客至則盤飧時具紵縞贈遺皆出自紡績之餘而絕無倦心於是四方賓客響附景從咸人人得其歡心而侍御公之名愈彰因以保聚鄉井室廬無恙致三黨咸得所依皆以推侍御公之畧及淑人之助云然僅知淑人之助其家而未知淑人且助公以祇勤國是也歲乙酉侍御公就豐潤令淑人則贊以撫恤困窮招集流散乘時墾植有能吏聲及公擢御史則贊以公爾忘私國爾忘家故侍御侃侃

朝列力以公廉砥礪時俗一時有真御史之稱而
吏治一清大抵士君子能達國體識時務充然欲
有所爲而屑屑於家人生計之謀則什且減二三
若侍御公之志氣卓犖遠謀廣慮曾無幾微芥蒂
於其間而以精白一心大起其功名謂非中助之
力不可也及南服未靖海氛猖獗
天子加意遠疆以爲非素有幹力不畏強禦如侍御
公不可於是

特簡參憲漳南先是

王師旅集沿海居民始苦於賊繼苦於兵往往嘯

聚山谷逆我顏行勦撫罔效淑人贊於公曰繇來
兵之所處荆棘生焉皆官不養兵故兵出而擾民
民益窮而爲盜清盜之源必先自養兵始於是軍
糈廩給公應之於外而軍中一切袍服衣帽牛酒
犒勞諸事淑人悉任之於內率家之僮婢晝夜督
理日給數千常致有餘無或不繼繇是軍無缺糈
民以安定而兵民交戢矣淑人又贊於公曰誰謂
漳南之多盜耶皆吾民也棄之則爲盜撫之則爲
民奚忍久遏其來歸之路盡斃之鋒鏑之下乎公
於是亟下招降之令所在如歸市未幾而漳南悉

平時各營俘獲老弱婦女不可勝計淑人又贊於公曰王師所至當令仁聲先路况此屬無辜何可聽其瑣尾仳離而不俾以生全歸其家室公乃得請

王命俛營間各出所掠之俘構室廬以居之給薪米以活之大諭民間所失親屬皆來識認完聚此公之保全漳南數萬家之父子夫婦者仁慈最厚陰德最大而亦皆淑人贊助之所致也未幾侍御公又備兵懷隆淑人隨焉一載轉楚督儲值李孽作亂奉

旨三省會勦數十萬兵需無間遠邇皆係公辦給時
山谿梗阻而轉運芻糧刻不容稽於是淑人親督
家人兩晝夜中立成布囊萬餘賫送軍前士氣加
奮顧曾不辭拮据以爲內助之道當如是也然則
淑人能識先務審大體不以一家之豐嗇爲謀不
以一人之勞逸爲計如狀所云勤國事以爲家事
繇婦道而成臣道古今來女史內則中所艷稱賢
能益著可傳可誦者洵未有若淑人也已若夫閨
門之內德宏樛木側室于氏程氏咸舉令子家庭
之暇訓子錫山令君言有可法行有可師兢兢於

忠義大節俾毋貽祖考羞迨至服官尤以慎名節
勤官守爲誨今日令君之清比惠泉聲高錫嶺循
卓冠天下大約皆本之慈訓至於撫三孤姪曰應
昌曰興宗曰興祖幼則教以讀書長則爲之婚娶
興宗官至嚴州郡守應昌子秉仁復爲誨讀婚娶
如其父以逮宗族之嫁娶喪葬及於親知故戚無
不量其多寡以爲助隣里之孤貧者咸周恤罔缺
焉其義問洋溢遠邇誠有丈夫子所未能致者已
乃若身貴而不遺情於荆布年高而不稍倦於勤
勞此又淑人之懿行徽德未可以盡爲繪述者也

嗟夫國之將興必有才人以開其先如周之文王
不特才如十亂若麟趾兔置之見於男子也自采
蘋采蘩喬木汝墳草蟲行露大率室家之篇居多
故能卒成王業端本化原若侍御公之忠勤憂國
慷慨任事余嘗韙之今讀淑人之狀信乎國非賢
才不足以成治家非內助不足以成化已淑人生
於明萬歷庚子十月二十二日子時終於

皇清康熙乙巳五月初九日申時享年六十有六歲
生丈夫子一興祚元配韓氏係肖宇韓公女繼娶
李氏係法一丹章京復元李公女生女二人長慶

姐許配兵部郎中前北城察院人傑祝公長子祝
兆麟次一姐許配原任常州府通府雲虹王公次
子王之曾今繼娶孔氏係武岡州知州惠菴孔公
女生子秉鈞女八姐次興基于出娶于氏係逢時
于公女生二子長秉智次桂孫女一人三姐許配
陝西鞏昌府成縣正尹達先連公之子連茂勲三
子興都程出娶萬氏係雲南右布政使明宇萬公
女生子一麟孫女三人五姐六姐七姐五姐許配
駐防京口鑲藍旗佐領牛彙章京吉士白公長子

白啓鑑淑人擇康熙

歲

葬於都城西山田村之陽爲之銘曰蔚蔚遼土興
王之都國士雲從女德亦殊卓哉孟母克贊其夫臣
忠蹇蹇婦順瞿瞿同憂國恤罔顧勞劬有子惟賢
載纘前謨孝孫繩繩用昌於吳世篤忠貞惟母之
愉

昔

康熙七年歲次戊申秋仲吉旦
予告光祿大夫太傅兼太子太師吏部尚書中和殿
內秘書院大學士加一級纂修

玉牒副總裁前太子少師兼太子太師少傅兼太子

太傅少保兼太子太保實支正一品俸充纂修

順治大訓總裁乙未科會試大主考吏兵工三部
尚書都察院掌院事左都御史吏兵二部右侍郎
充丙戌己丑乙未辛丑四科

殿試讀卷官由己未科進士出身朞功通家眷生
金之俊頓首拜撰

孝淑張孺人行狀

孺人敬菴吳君配也孺人出自柯山張余室人係孺人女姪云孺人歿於萬歷二十年壬辰六月初三日纔三十有四耳歲丙午余外艱家居朝夕守苦塊屏他務一日敬菴過余曰先室逝有年矣而狀闕焉幸聯姻於君求其悉內概者莫君若乞徵君言以附家乘余不敢辭乃退而狀孺人大父思聰爲楚大參父士宏爲順德邑贊尹俱著聲績外大父八山錢公榷以進士爲北比部郎孺人蓋各門媛也皙而豐姿爲越中冠及笄歸吳舅序班石

洲公姑朱太安人性方嚴難得其懽心孺人事之
謹舅姑歡甚舅病劇醫云惟乳可療時購乳莫得
孺人日以已乳進姑或怒他人波及孺人卽屏氣
婉容以承若弗已及者厨中治穀款每視客高下
以爲隆殺諸叔姒六人孺人以冢婦總家務攻苦
爲諸姒先門內無違言下至臧獲怡怡如也石洲
謝世時敬菴年尚少懼吳氏中廢孺人勸習韜鈴
授羽林衛將軍敬菴或不屑檢於繩孺人卽爲之
微諫諫未嘗不力有媵竊太安人數百金與孺人
藏匿孺人曰此銀從何而來終是禍階令其復還

故處有叔遺銀疑諸人攘之貨籠中小佛陳庭中
以詛孺人以爲不祥陰脫簪髻代償卒不令人知
故石洲公朱太安人恆對人言稱孺人之賢不置
口孺人生三女男多早卒時年方艾卽勸敬菴納
側室江沱之嫡遠出下風矣卒之日親戚鄉黨莫
不盡哀弔者盈門謚曰孝淑僉曰允宜朱太安人
以天喪良媳哀泣逾年而卒嗟乎賢若孺人而奪
之速不憇遺一嗣彼蒼謂何今一女適會稽陶榮
齡舉丙午科足增孺人光繼虞孺人育五子俱稱
岐嶷人皆謂天報孺人云

萬歷三十五年丁未仲冬

賜進士奉直大夫工部營膳司員外郎金應鳳撰

文書不悉盡一歸於蒼生回今一丈也...
以天與其賦稟於愈乎而卒與乎...
不盡其用者蓋出於曰幸歟愈曰...
時室正於文獻出下風與...
口體人主三女與...
始亦州邑未...
以助醫人以...
始亦...

山西平陽府霍州州判寄碧公墓誌銘

年月日山西平陽府霍州判官寄碧吳公卜葬於山陰茅山之原其子閻珣以公狀來屬其友新城高曰時爲誌其墓而銘之按狀公諱汝宏字能之寄碧其號也山陰州山里人性淳厚好讀書有大畧始遊京師其族叔高純丞之艾公知其能僭之官未幾丞卒貧不能歸旅櫬公扶義爲謁上官僚友得歸櫬及其妻子公以族屬居大司馬留村公幕府凡三十餘年留村甚器重之方留村宰萍鄉時公索逋粵中便道晉謁

畱村畱村時年十八公年十九語合歡甚遂畱
署中畱村方少壯負氣弄兵具馳射自豪與公
討論左氏司馬法攻服制勝之畧公爲誦車攻
六月引方叔吉甫以欣慰之其後畱村以閩撫
出師平海公內參籌畧外閱視糧器橐鞬從征
破白鴿嶺解泉州圍克復永春海壇金門廈門
等隘報上

天子晉畱村大司馬總制兩廣公以軍功加二十級
授霍州判官

賜秩正一品一時壯其遇自公卿貴人友朋親族之

在都者咸祖餞西門外作詩章以美之古人以
記室贊軍榮未有加焉者也霍州當秦蜀之衝
滇逆未平軍役旁午大僚知公能委以繁劇公
從容游刃事罔不舉刺史王公雲鳳太守梁公
纘祖河東副使張公大本交推薦公攝聞喜浮
山二邑篆律已嚴御下簡農安於野商安于市
謳歌遍道路號曰吳佛少宰張公士甄宗伯杜
公臻啣

命過境悉公廉能將薦公大用而公以足疾乞休去
官之日百姓號泣卧轍日旰不得行公生平掩

人之惡揚人之善排人之難解人之紛見義無
命不爲恩無不報所不得報者唯高淳老嫗嘗以
爲恨老嫗者侍公元配何夫人疾于高淳者也
居官三載所食俸金不吝推解周宗戚賑乏困
其從兄汝德子成龍貧無依兒畜之爲娶婦成
龍蚤卒恤其孤寡三子成立始析居更爲嫁其
女宗黨莫不高其義焉高祖相曾祖篋祖皞俱
潛德不仕考佐明江西進賢縣丞遷福建鎮海
衛參軍公元配何氏蚤卒繼娶王氏皆封一品
夫人側室顧氏生子一閻珣國學生考授縣丞

女一繼室王氏出適同邑朱文懿公七世孫芝
孫二長企健次企文銘曰

載筆佐治 以武功成 已物偕臧

久而彌貞 不愧在官 所歷有聲

歸茲封壤 利其宗祊 延延綿綿

與山水盟

浙江嘉興府桐鄉縣教諭新城高曰時撰